



Broj/Broj: 4/1-50-1-83-24/05
Sarajevo/Sarajevo: 29.7.2005. godine

ZAPISNIK

24. sjednice Zajedničke komisije Parlamentarne skupštine BiH za odbranenu i sigurnosnu politiku i nadzor nad radom odbrambenih i sigurnosnih struktura na nivou BiH

Sjednica je održana 29.7. 2005. godine, u vremenu od 10,00 do 12,30 sati.

Sjednici su prisustvovali članovi Zajedničke komisije: Boško Šiljegović, Seada Palavrić, Šefik Džaferović, Adem Huskić, Momčilo Novaković, Vinko Zorić, Halid Genjac, Vinko Radovanović i Anto Spajić.

Iz opravdanih razloga sjednici nisu prisustvovali: Osman Brka, Branko Zrno i Mirko Blagojević. Sjednici su također prisustvovali gosti: dr. Raffi Gregorian i Nikola Radovanović, kopredsjedavajući Komisije za reformu odbrane, Fahrudin Selimović, zamjenik šefa Policije Brčko Distrikta, Christian Haupt iz OSCE-a, Neven Kazazović, savjetnik u Komisiji za odbranu i sigurnost Parlamenta FBiH.

Osim navedenih, sjednici su prisustvovali: Dragica Hinić, privremeni sekretar Komisije, Željko Grubešić, savjetnik za pomoć u radu Komisije, i Adnan Bešić iz Istraživačkog centra Parlamentarne skupštine BiH i Albina Ibrahimagić, pripravnik-volonter.

Za raspravu na sjednici predložen je sljedeći

DNEVNI RED

1. Razmatranje inicijative za uvrštavanje u parlamentarnu proceduru Zakona o odbrani BiH, Zakona o službi u Oružanim snagama BiH i Zakona o izmjeni Zakona o ministarstvima i drugim organima uprave Bosne i Hercegovine (Izvjestioci: kopredsjedavajući Komisije za reformu odbrane);
2. Verifikacija zapisnika 21., 22. i 23. sjednice Zajedničke komisije;
3. Informacija o statusu Jedinice OSBiH za uništavanje NUS-a u misiji Iračka sloboda (Izjavitelj: ministar odbrane BiH);
4. Informacija o radu Policije Brčko Distrikta (Izjavitelj: šef Policije Brčko Distrikta);
5. Razmatranje Obavještenja i Izjašnjenja Predstavničkog doma Parlamenta Federacije BiH o pitanju prijenosa nadležnosti nad namjenskom industrijom na nadležno civilno ministarstvo;

6. Razmatranje rezultata ankete o preferencama članova Zajedničke komisije za održavanje kurseva engleskog jezika i rada na računarima;
7. Tekuća pitanja:
 - a) Izvještaj o posjeti Zajedničke komisije jedinicama Terenskog ureda DGS-a u Brčkom i Bijeljini;
 - b) Izvještaj o sastanku članova Zajedničke komisije s Hubertom Pirkerom, specijalnim koordinatorom Pakta stabilnosti za JI Evropu za borbu protiv organiziranog kriminala i antikorupcionu inicijativu (SPOC), s prijedlogom za izbor jednog člana Komisije u SPOC;
 - c) Informacija o održanoj radionici o temi "Naučene lekcije država članica NATO/PFP", Ilidža;
 - d) Informacija o održanoj radionici o temi "Budžet odbrane u 2006. godini i Plan finansiranja odbrane za period 2007.-2008.";
 - e) Izveštaj o posjeti parlamentima i radnim tijelima Državne zajednice Srbija i Crna Gora i R Makedonije.

Boško Šiljegović informirao je prisutne da je na inicijativu kopredsjedavajućih Komisije za reformu odbrane, kao prvu tačku dnevnog reda, predložio Inicijativu za uvrštavanje zakona iz oblasti odbrane u parlamentarnu proceduru, te istovremeno predložio da se, zbog prisustva ministra odbrane koji je izvjestilac i za tačku 3. dnevnog reda, ova tačka razmatra kao tačka 2., te bi se shodno tome i ostale tačke pomjerile.

Adem Huskić predložio je da se posljednja tačka dnevnog reda dopuni razmatranjem određenih pitanja, i to u pravcu stvaranja obaveze Zajedničkoj komisiji da ih uvrsti u razmatranje na nekoj od svojih narednih sjednica. Pitanja koja bi trebalo razmatrati su:

Informacija o uništenju lakog naoružanja i municije koju bi trebalo sačiniti Ministarstvo odbrane BiH, pitanje početka razgovora državnih organa BiH sa susjednim zemljama oko smanjenja vojnog i ljudskog potencijala s obzirom na promjene koje su već učinjene u našoj zemlji, pitanje obaveznog prekida inspekcija entitetskih vojski, te pitanje stvaranja obaveze Ministarstvu sigurnosti BiH da sačini Prijedlog zakona o zaštitarskim firmama u BiH i Prijedlog zakona o korištenju i dobivanju dozvola za malo naoružanje.

Prijedlozi Adema Huskića prihvaćeni su jednoglasno u smislu inicijative za uvrštavanje u dnevni red jedne od narednih sjednica Komisije, a prijedlog Boška Šiljegovića, kao i dnevni red u cjelini, usvojeni su jednoglasno.

Ad. 1. Razmatranje inicijative za uvrštavanje u parlamentarnu proceduru Zakona o odbrani BiH, Zakona o službi u Oružanim snagama BiH i Zakona o izmjeni Zakona o ministarstvima i drugim organima uprave Bosne i Hercegovine (Izvjestioci: kopredsjedavajući Komisije za reformu odbrane)

Boško Šiljegović dao je uvodne napomene o procesu izrade Zakona o odbrani BiH i Zakona o službi u Oružanim snagama BiH pred Komisijom za reformu odbrane. Ovaj proces nedavno je završen potpisivanjem saglasnosti članova Komisije za reformu odbrane, ali i drugih najznačajnijih subjekata političkog života u BiH za upućivanje u parlamentarnu proceduru. Istaknuo je da je Zajednička komisija neposredno učestvovala u radu Komisije za reformu odbrane uključivanjem svoja tri predstavnika, te naglasio da će se ova saradnja i koordinacija nastaviti. Nesumnjivo je da je uspjeh Komisije i rezultat rada kopredsjedavajućih.

Raffi Gregorian istaknuo je značaj zadatka koji je izvršila Komisija za reformu odbrane, sačinivši dva ovako značajna zakonska projekta, čemu su svakako umnogome pomogli i članovi Zajedničke komisije koji su učestvovali u tom procesu, pored niza drugih učesnika, predstavnika državnih i entitetskih organa. Ovi nacrti zakona urađeni su na jezicima tri konstitutivna naroda, dostavljeni državnom i entitetskim parlamentima i spremni za formalno upućivanje u parlamentarnu proceduru. Stoga smatra da je o ovim zakonima sada jedino potrebno provesti javnu korektnu raspravu u svim parlamentima. Potom je izrazio zabrinutost zbog nedostata vremena za

usvajanje zakona, koji bi pred državnim parlamentom trebalo da budu usvojeni u septembru tekuće godine, a što je neophodan uslov za planiranje i donošenje budžeta odbrane za narednu fiskalnu godinu, i njegovu primjenu od 1.1.2006.

Nikola Radovanović istaknuo je aktivnosti u ovom procesu koje treba da preduzme Vijeće ministara BiH i entitetske institucije. Ponovio je da su zakoni zajedno s obrazloženjima, pri čemu je posebno istaknuo obrazloženje političko-pravnog konteksta donošenja zakona, dostavljeni i Vijeću ministara BiH, ministrima odbrane, entitetskim vladama i parlamentima. Iako su zakoni dostavljeni entitetskim institucijama, prema njegovom saznanju, Vlada RS-a nije ih uvrstila u dnevni red svoje već dvije održane sjednice. Informirao je i o obavljenim razgovorima s Kolegijem u proširenom sastavu Predstavničkog doma, te Kolegijem Doma naroda Parlamenta BiH i rukovodstvom Zajedničke komisije o neophodnosti upućivanja u parlamentarnu proceduru ovih zakona zbog izuzetno ograničenog vremena, koje je uslov za pravovremene pripreme za primjenu budžeta odbrane početkom naredne godine. Također je naglasio da je zakone imao namjeru uputiti u proceduru putem Vijeća ministara BiH, ali da to nije bilo moguće s obzirom da je za takav proces neophodno prethodno dobiti saglasnost entitetskih parlamenata. S obzirom na rečeno, u Komisiji za reformu odbrane smatrali su da bi se Zajednička komisija mogla naći u ulozi predlagača ovih zakona i uputiti ih odmah u parlamentarnu proceduru.

Šefik Džaferović istaknuo je da su izradom nacrtu zakona na najvišem nivou usaglašena sva pitanja koja čine suštinu reformi odbrane. Stoga sama suština ne bi trebalo da bude sporna, već pitanje forme upućivanja zakona u proceduru. Pri tome ulogu Vijeća ministara BiH ne treba svesti samo na pitanje forme. Međutim, ako se bude čekalo uključivanje Vijeća ministara BiH u ovaj proces, objektivno gledano, izgubit će se previše vremena. Zato, ako Zajednička komisija, u svojstvu predlagača, zakone odmah uputi u proceduru, imamo mogućnost njihovog razmatranja u septembru, dok se u međuvremenu o njima može izjasniti i Vijeće ministara BiH i entitetske vlade i parlamenti. Iz navedenih razloga on podržava prijedlog kopredsjedavajućih Komisije da Zajednička komisija na ovoj sjednici odluči o preuzimanju uloge predlagača zakona i uputi ih odmah u parlamentarnu proceduru, što je u skladu s odredbama poslovnika oba doma.

Momčilo Novaković naglasio je određene dileme koje bi trebalo prethodno razjasniti. Upitao je na koji način Vlada i Narodna skupština RS-a mogu izvršiti prijenos nadležnosti na državu u ovoj oblasti i kojim slijedom, odnosno da li prvo zakone uputiti u parlamentarnu proceduru pa zahtijevati tu saglasnost ili obratno. Očito je da je potrebno prethodno dobiti saglasnost entitetskih institucija, pa tek onda zakone uputiti u proceduru, jer da je suprotni postupak dovoljan, Vijeće ministara BiH ne bi uslovljavalo postojanje navedene saglasnosti za upućivanje zakona u proceduru. Isti postupak bit će i pred Ustavno-pravnom komisijom ako zakoni budu upućeni u proceduru bez dobivanja mišljenja i saglasnosti entitetskih parlamenata. Stoga bi bilo neophodno da Vijeće ministara BiH od Vlade i Narodne skupštine RS-a odmah zatraži saglasnost za prijenos nadležnosti, kao uslov za usvajanje navedenih zakona. Zbog toga smatra da nisu problem institucije RS-a nego Vijeće ministara BiH. I u slučaju da Zajednička komisija na ovoj sjednici odluči da preuzme ulogu predlagača zakona, ne bi se ništa postiglo s obzirom da se opet mora čekati izjašnjavanje Narodne skupštine RS-a. Za njega preuzimanje uloge predlagača zakona nije samo formalno pitanje, već suštinski potez iz svih navedenih razloga, gdje ključnu ulogu treba da ima Vijeće ministara BiH. U skladu s odredbama Poslovnika, mišljenja je da je u mnogo navrata odlučivano da se određena procedura razmatranja zakonskih projekata skрати, pa se to može učiniti i u ovom slučaju. Na kraju je istaknuo da zakone nije imao vremena ni pročitati, te uz ovaj kao i sve navedene razloge, ne može podržati prijedlog da Zajednička komisija bude predlagač zakona.

Vinko Radovanović istaknuo je da navedeni prijedlog nije u skladu s entitetskim ustavom, te da je stoga neophodno prethodno dobiti saglasnost entitetskih parlamenata za prijenos nadležnosti da bi se zakoni potom uputili u parlamentarnu proceduru. I on smatra da rokovi neće biti problem čim se dobije saglasnost Narodne skupštine RS-a.

Vinko Zorić izrazio je nezadovoljstvo jer tekstove zakona nije dobio na hrvatskom jeziku, te ih nije pročitao i ne može stajati iza njih.

Nikola Radovanović informirao je da je služba Ministarstva odbrane BiH Zajedničkoj komisiji dostavila tekstove zakona na jezicima konstitutivnih naroda, te da ih treba samo distribuirati. Potom je naglasio da predložene reforme nisu u suprotnosti s Ustavom FBiH s obzirom da je Parlament FBiH ranije donio odluku o prijenosu nadležnosti u ovoj oblasti na državni nivo, dok u RS-u to još nije urađeno. Prethodnih dana obavljani su razgovori s predsjednikom Narodne skupštine RS-a, koji također smatra da će ova odluka biti donesena, da bi se potom pokrenula i inicijativa za izmjenu Ustava RS-a, s tim da ovaj proces traje najmanje 30 dana. Vijeće ministara BiH bez navedene odluke o prijenosu nadležnosti ne može uputiti zakone u proceduru s pozitivnim mišljenjem o postojanju ustavnog osnova. Vijeću ministara BiH, kao i Vladi RS-a tekstovi zakona dostavljeni su, uz zahtjev za pokretanje procedure za izmjenu Ustava RS-a. Na predmetni zahtjev nije bilo nikakvih reakcija, iako je u međuvremenu Vlada RS-a održala dvije sjednice. Predloženi zakoni nisu u suprotnosti s Ustavom BiH, te se stoga u međuvremenu može obaviti rasprava o procedurama po kojima bi se ovi zakoni razmatrali, a sve s ciljem gubitka što manje vremena.

Raffi Gregorian naglasio je činjenicu da su sve institucije u BiH izrazile nedvosmisleni volju za priključenje NATO-u, na čemu je intenzivno rađeno posljednjih šest mjeseci. Tekstovi ovih zakona rezultat su tog rada. Obavljen je niz razgovora s najvišim predstavnicima u BiH i entitetima napominjući pri tome posljednji susret s predsjednikom Narodne skupštine RS-a, koji je obećao početak ove procedure pred navedenim tijelom od 19. jula ove godine. Od tada je Vlada RS-a održala dvije sjednice, kao i Narodna skupština, ali se nisu dotakli ovog pitanja. U međuvremenu, generalni sekretar NATO-a pozvao je sve činioce da što prije završe posao na usvajanju navedenih zakona. Iako su svi politički činioci u BiH iskazali volju za usvajanjem zakona na čiji tekst nema suštinskih primjedbi, ovi akti još se ne nalaze u parlamentarnoj proceduri. Zato će njemu biti veoma teško objasniti predstavnicima međunarodne zajednice i NATO-a razloge ovakve situacije.

Adem Huskić istaknuo je da je Komisija za reformu odbrane uradila ogroman posao koji je rezultirao tekstovima dva zakona, na koje niko nema suštinskih primjedbi. Zato je izrazio razočarenje ovakvom situacijom, jer bi upućivanje zakona u parlamentarnu proceduru iskazalo nedvosmisleni volju naše zemlje za priključenje NATO-u, te je apelirao na kolege da prevaziđu ovu situaciju.

Momčilo Novaković suprotnog je mišljenja od prethodnika. Upućivanjem u proceduru zakona u toku dana kada se održava ovaj sastanak neće se omogućiti rasprava o zakonima u Parlamentu BiH, jer će se zaustaviti već pred Ustavno-pravnom komisijom koja neće moći dati pozitivno mišljenje o postojanju ustavnog osnova, sve do izjašnjavanja entitetskih institucija. Stoga u ovakvom razmišljanju nema opstrukcije. Pri tome on ne osporava nikom od kolega da zakone u proceduru upute kao ovlašteni predlagачи.

Anto Spajić istaknuo je da su svi politički činioci u BiH odavno iskazali svoje opredjeljenje za organizacijom odbrane na državnom nivou. U ovom trenutku Zajednička komisija našla bi se u dvojakoј ulozi - ulozi predlagача i nadležne komisije za razmatranje zakona. Time bi ova komisija preuzela ulogu Vijeća ministara BiH, kojem treba uputiti najoštriju kritiku. Na kraju je naglasio da predmetni zakoni zbog njihovog značaja treba što prije da se nađu u parlamentarnoj proceduri.

Halid Genjac smatra da se u ulozi predlagача ovih zakona može naći Zajednička komisija samo u slučaju da postoji konsenzus svih članova. Ukoliko bi ova komisija u toku dana uputila zakone u proceduru, oni bi bili razmatrani pred ustavno-pravnim komisijama domova u narednom roku od 15 dana, negdje do 10.8.2005. Do tada, najvjerovatnije, neće biti donesena entitetska odluka o prijenosu nadležnosti. S druge strane, bilo bi mnogo bolje da se s parlamentarnom procedurom krene i da se čekaju potrebne entitetske odluke za nastavak procedure, nego da se prethodno ide s raspravom pred entitetskim institucijama, pa tek onda pred Parlamentom BiH, jer je to znatan gubitak vremena. U svakom slučaju, potrebno je postići neophodan stepen koordinacije u ovom procesu, gdje bi do kraja avgusta trebali dobiti saglasnost o prijenosu nadležnosti kao neophodan uslov za nastavak parlamentarne procedure. Pri tome treba uvažiti i realnost da neki članovi Zajedničke komisije nisu saglasni za ovakav način rješavanja ovog pitanja, te da se i svaki član pojedinačno može naći u ulozi predlagача zakona.

Šefik Džaferović protumačio je odredbe poslovnika oba doma Parlamenta BiH po kojima nije potrebna odluka Zajedničke komisije donesena konsenzusom da bi se ova komisija našla u ulozi predlagača zakona. Također, neosporno je postojanje ustavnog osnova u Ustavu BiH za donošenje zakona, što je dovoljno za rad ustavno-pravnih komisija u narednih 15 dana, s obzirom da je isti slučaj bio i prilikom usvajanja Zakona o odbrani BiH. Ustavno-pravne komisije bi u navedenom roku mogle sačekati odluku Narodne skupštine RS-a i potom bi se moglo odmah ići u narednu fazu razmatranja pred nadležnom komisijom. Ova faza bi također mogla biti skraćena, s obzirom da je i u nekim ranijim slučajevima Kolegij donio sličnu odluku. Na ovakav način zakoni bi bili usvojeni do kraja septembra. Potom je iskazao spremnost da se odmah nađe u ulozi predlagača zakona, ali i istaknuo da ne bi bilo dobro da se u toj ulozi ne nađu predstavnici sva tri naroda.

Boško Šiljegović naglasio je da gotovo niko nema suštinskih primjedbi na tekstove zakona, koji su rezultat dugotrajnih pregovora i kompromisa. Međutim, u ovom slučaju radi se o nizu suštinskih odluka koje se odnose na status institucija u RS-u, kao što je ukidanje Ministarstva odbrane RS-a, prijenos budžetiranja odbrane na državni nivo, ukidanje regrutacije i pitanje rezervnog sastava i sl. Ova pitanja podrazumijevaju korjenite izmjene Ustava RS-a o kojima, prije svega, odluku mora donijeti Narodna skupština RS-a, kako bi se potom zakoni razmatrali pred Parlamentom BiH.

Momčilo Novaković, uzimajući u obzir diskusiju Šefika Džaferovića, smatra da je u ovom trenutku još rizičnije odmah donijeti odluku o upućivanju zakona u parlamentarnu proceduru, jer postoji mogućnost da Ustavno-pravna komisija ne utvrdi postojanje ustavnog osnova na svojoj prvoj sjednici s obzirom da nema odgovarajuće entitetske odluke, što ovaj proces može samo produžiti.

Seada Palavrić naglasila je da je tekstove zakona potpisala s obzirom da je rukovodstvo SDA postiglo sporazum o njima i jer su oni rezultat dugotrajnog rada i usaglašavanja. U toku procesa izrade predmetnih zakona nikada nije bilo riječi o tome da će se Zajednička komisija naći u ulozi njihovog predlagača, već je pretpostavljeno da će se do završetka procesa njihove izrade pribaviti entitetska saglasnost o prijenosu nadležnosti. Zajednička komisija ne može od entiteta zahtijevati da nešto učine ili ne, već jedino apelirati da se ovaj proces što prije završi. Stoga je mišljenja da je najbolje rješenje da se u ulozi predlagača zakona nađe Vijeće ministara BiH ili Predsjedništvo BiH, te da se u međuvremenu dobije potrebna entitetska saglasnost.

Nikola Radovanović smatra da razmišljanje Halida Genjca ostavlja dovoljno prostora za rješavanje ovog pitanja. Kao ključno pitanje ponovo je naglasio pitanje kratkog vremena za usvajanje zakona. Potom je predložio da Zajednička komisija usvoji zaključak kojim bi istaknula da je razmatrala navedena pitanja, konstatala da je vremenski okvir za usvajanje zakona izuzetno kratak, da podržava i smatra neophodnim usvajanje zakona pred Parlamentom BiH do kraja septembra. Stoga je neophodno da svi relevantni činioci u BiH učine maksimalan napor i odmah se angažiraju u tom pravcu. Ovaj zaključak treba uputiti predsjedavajućem Vijeća ministara BiH, Predsjedništvu BiH, predsjednicima entiteta i entitetskih vlada, entitetskim ministrima odbrane, predsjedavajućim domova entitetskih parlamenata, Zajedničkom štabu Vojske FBiH i Generalštabu Vojske RS-a.

Nakon rasprave i usaglašavanja teksta predloženog zaključka, Zajednička komisija jednoglasno je usvojila sljedeći **zaključak**:

Zajednička komisija za odrambenu i sigurnosnu politiku i nadzor nad radom odrambenih i sigurnosnih struktura na nivou BiH na 24. sjednici, održanoj 29.7.2005. godine, prilikom razmatranja inicijative kopredsjedavajućih Komisije za reformu odbrane za upućivanje u parlamentarnu proceduru Zakona o odbrani BiH i Zakona o službi u Oružanim snagama BiH, konstatala je da je vremenski okvir za njihovo usvajanje veoma kratak. Zbog toga Zajednička komisija poziva sve relevantne državne i entitetske institucije da učine maksimalne napore i izvrše preuzete obaveze u rokovima planiranim dinamikom Komisije za reformu odbrane (najkasnije do

1.9.2005.), kako bi Parlamentarna skupština BiH do kraja septembra tekuće godine mogla završiti proces usvajanja predmetnih zakona.

Navedeni zaključak treba uputiti predsjedavajućem Vijeća ministara BiH, Predsjedništvu BiH, predsjednicima entiteta i entitetskih vlada, entitetskim ministrima odbrane, predsjednicima domova entitetskih parlamenata, Zajedničkom štabu Vojske FBiH i Generalštabu Vojske RS-a.

Ad.2. Informacija o statusu Jedinice OSBiH za uništavanje NUS-a u misiji Iračka sloboda (Izvjestilac: ministar odbrane BiH)

Nikola Radovanović kratko je obazložio Informaciju o statusu Jedinice OSBiH za uništavanje NUS-a u misiji Iračka sloboda, koja ima dva dijela. Prvi dio obrađuje aktivnosti koje su prethodile upućivanju Jedinice u Irak, dok drugi dio obrađuje aktivnosti koje je ova jedinica imala u prvih šest mjeseci. Zaključio je da je realizacija svih zadataka tekla po utvrđenom planu i da su svi organi i institucije ispunili utvrđene obaveze, te da je uspostavljena dobra saradnja sa SAD-om, Kuvajtom i Komandom Koalicionih snaga u Iraku. Potom je informirao i o obavljenoj posjeti Jedinici u Iraku. Naglasio je i da je u toku faza pregovora o potpisivanju Ugovora o statusu snaga SAD-a u BiH, te da je Bosna i Hercegovina prva zemlja koja vodi ovakve bilateralne pregovore s Vladom SAD-a, što je znak uvažavanja naše zemlje. Potom je istaknuo da je ulaskom Bosne i Hercegovine u kolacione trupe naša zemlja preuzela obavezu zaštite podataka. Stoga će biti neophodno razmotriti pitanje procedura zaštite tajnosti podataka, s obzirom da će se u skladu s ovom obavezom ubuduće dostavljati informacije o našem učešću u Iraku. Na kraju je predložio da Zajednička komisija ovu informaciju primi k znanju naglašavajući da će Ministarstvo odbrane BiH i dalje informirati o navedenoj jedinici u Iraku, uz neophodan uslov poštovanja tajnosti podataka.

Seada Palavrić saglasna je da je neophodno zaštititi podatke o Jedinici u Iraku, te da bi potrebne procedure i akte o ovoj zaštiti trebalo da sačini osoblje Ministarstva odbrane BiH i Zajedničke komisije.

Na pitanje **Halida Genjca** o mogućnosti posjete članova Zajedničke komisije Jedinici u Iraku, **Nikola Radovanović** istaknuo je da je posjeta moguća, s tim da je neophodan određeni vremenski period za pripreme u trajanju od najmanje mjesec dana. Također, Komanda Kolacionih snaga donijela je odluku da se sve posjete obustave do daljnjeg, odnosno do završetka aktivnosti na donošenju novog ustava u Iraku. Posjete bi trebalo da budu dozvoljene tek negdje od 15. oktobra, s tim da bi već trebalo početi s aktivnostima na pripremi posjete. Na pitanje o upućivanju informacije Parlamentu BiH, odgovorio je da Zajednička komisija može odlučiti da li će ovu ili naredne informacije proslijediti domovima, uz obavezno poštovanje pomenute zaštite podataka.

Nakon rasprave, članovi Zajedničke komisije primili su Informaciju k znanju uz zaključak da nema potrebe proslijediti je domovima. Također jednoglasno, usvojili su sljedeće **zaključke**:

1. Ministarstvo odbrane BiH je na izuzetno kvalitetan način izvršilo pripreme za odlazak Jedinice u Irak;
2. Zajednička komisija daje punu podršku daljnjim aktivnostima koje Ministarstvo odbrane BiH preduzima za boravak Jedinice u Iraku i nastavak ove aktivnosti;
3. Ministarstvo odbrane BiH redovno će informirati Zajedničku komisiju o svim aktivnostima vezanim za Jedinicu u Iraku, kao i daljnjim aktivnostima koje će biti preduzete za nastavak ove misije, kao što je neophodna obuka nove grupe vojnika koja će biti upućena u Irak, a u skladu s neophodnom zaštitom informacija;
4. Zajednička komisija poziva Ministarstvo odbrane BiH da odmah počne aktivnosti i osigura neophodne uslove za posjetu predstavnika Zajedničke komisije jedinici u Iraku;
5. Zaposleni u Ministarstvu odbrane BiH će, u saradnji sa Željkom Grubešićem i Christianom Hauptom, sačiniti neophodne procedure za zaštitu podataka.

Ad.3. Verifikacija zapisnika 21., 22. i 23. sjednice Zajedničke komisije

Zapisnici 21., 22. i 23. sjednice Zajedničke komisije jednoglasno su verificirani.

Ad.4. Informacija o radu Policije Brčko Distrikta (Izjavitelj: šef Policije Brčko Distrikta)

Boško Šiljegović izrazio je, prije informiranja o Izvještaju o radu Policije Brčko Distrikta BiH za 2004. godinu, koji Zajednička komisija u skladu s svojom nadležnošću razmatra u formi informacije, predstavniku ove institucije zahvalnost za otvoren i srdačan prijem prilikom posjete predstavnika Komisije institucijama Brčko Distrikta BiH. Istaknuo je potom da je predmetni izvještaj dostavljen i Ministarstvu sigurnosti BiH, te da ga je usvojila Skupština Brčko Distrikta. Razmatranje Izvještaja pred Zajedničkom komisijom jedan je od prvih koraka u procesu povezivanja i bolje saradnje s institucijama i tijelima Brčko Distrikta.

Fahrudin Selimović, zamjenik šefa Policije Brčko Distrikta BiH, dao je metodološki osvrt na navedenu informaciju po pojedinim aspektima sigurnosti kao što je: oblast javnog reda i mira, oblast sigurnosti saobraćaja, oblast kriminaliteta i sl. , pri čemu je istaknuo respektabilne rezultate. Posebno je naglasio da dugi niz godina nema etničkih incidenata, na što su ponosni i što je značajan uslov za povratak izbjeglih i raseljenih osoba. U tekućoj godini postignuti su još bolji rezultati nego u godini koju obrađuje Izvještaj. Također, ostvarena je dobra saradnja s entitetskim centrima sigurnosti.

Momčilo Novaković podržao je ovakav način razmatranja akata institucija Brčko Distrikta u Parlamentu BiH, jer do sada nije bilo dovoljno informacija o radu tijela i institucija Distrikta. Istaknuo je i činjenicu da je razgovarao s određenim osobama u vezi s pitanjem analiziranja Arbitražne odluke za Distrikt u pogledu odnosa Distrikta i Bosne i Hercegovine. Potom je postavio pitanje u vezi sa slučajem ubistva jedne djevojke koji se desio prije dvije-tri godine.

Fahrudin Selimović istaknuo je da ovaj slučaj, kao rijedak, još nije riješen i da nije otkriven počinitelj. Pri tome je naglasio da istraga još traje i da se njeni rezultati očekuju.

Nakon rasprave, uz zadovoljstvo za uspostavljanje ovakvog načina saradnje i informiranosti o radu tijela i institucija Brčko Distrikta, članovi Zajedničke komisije primili su Informaciju k znanju.

Ad.5. Razmatranje Obavještenja i Izjašnjenja Predstavničkog doma Parlamenta Federacije BiH o pitanju prijenosa nadležnosti nad namjenskom industrijom na nadležno civilno ministarstvo

Članovi Zajedničke komisije primili su k znanju Informaciju Parlamenta FBiH o učinjenim aktivnostima na prijenosu nadležnosti nad namjenskom industrijom na nadležno civilno ministarstvo.

Ad.6. Razmatranje rezultata ankete o preferencama članova Zajedničke komisije za održavanje kurseva engleskog jezika i rada na računarima

Razmatranje rezultata ankete u vezi s organizacijom kurseva engleskog jezika i rada na računarima članovi Zajedničke komisije jednoglasno su odgodili za septembar.

U međuvremenu, do 1.septembra sekretar i savjetnik Zajedničke komisije sagledat će iskazane mogućnosti i želje članova Komisije, nakon čega će biti sačinjen konačan prijedlog kurseva.

Ad.7. Tekuća pitanja:

a) Kratka informacija o posjeti članova Zajedničke komisije Brčkom i Bijeljini

Boško Šiljegović ukratko je informirao o posjeti Terenskom uredu DGS-a Sjeveroistok - jedinicama u Brčkom i Bijeljini, zatim Policiji, kao i gradonačelniku i predsjedniku Skupštine Brčko Distrikta BiH od 31.5. do 1.6.2005. Ova izuzetno korisna posjeta iskorištena je za sagledavanje situacije u navedenim strukturama, na osnovu čega je sačinjena i kompletna detaljna informacija.

Informacija je potom primljena k znanju.

b) Informacija o sastanku s Hubertom Pirkerom, predsjedavajućim Inicijative Pakta stabilnosti za borbu protiv organiziranog kriminala (SPOC), i prijedlog izbora člana Zajedničke komisije u ovu organizaciju

Informacija je primljena k znanju i jednoglasno je zaključeno da se odluka o izboru člana Komisije u SPOC donese na sljedećoj sjednici.

c) Informacija o održanoj radionici o temi "Naučene lekcije država članica NATO/PFP", Ilidža

Informacija je primljena k znanju.

d) Informacija o održanoj radionici o temi "Budžet odbrane u 2006. i Plan finansiranja odbrane za period 2007.-2008."

Informacija je primljena k znanju.

e) Izvještaj o posjeti parlamentima i radnim tijelima Državne zajednice Srbija i Crna Gora i R Makedonije

Članovi Komisije jednoglasno su usvojili Izvještaj o posjetama radnim tijelima parlamenata Makedonije i Srbije i Crne Gore, koje su obavljene u periodu od 12. do 15. 7.2005. godine.

Zapisnik sačinila
Dragica Hinić

Privremeni predsjedavajući
Zajedničke komisije
Boško Šiljegović